

MESYUARAT KETIGA, PENGGAL KEDUA
PARLIMEN KEEMPAT BELAS
2019

HARI SELASA : 26 NOVEMBER 2019

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : TUAN HASSAN BIN ABDUL KARIM
[PASIR GUDANG]
TARIKH : 26 NOVEMBER 2019 (SELASA)

SOALAN NO. 1

Y.B. TUAN HASSAN BIN ABDUL KARIM [PASIR GUDANG] minta **MENTERI KEWANGAN** menyatakan sejauh mana kemajuan yang telah dicapai oleh Bank Negara Malaysia untuk membantu lebih ramai rakyat berpendapatan rendah memiliki rumah mampu milik.

JAWAPAN

Yang di-Pertua,

1. Untuk makluman Ahli Yang Berhormat, Bank Negara Malaysia (BNM) dan institusi kewangan telah mengambil langkah-langkah untuk mengurangkan kos sampingan pemilikan rumah bagi membantu pembeli rumah dengan menubuhkan Dana Rumah Mampu Milik dengan peruntukan berjumlah RM1 bilion. Melalui Dana ini, pembeli rumah pertama, terutamanya golongan muda, akan mendapat pembiayaan daripada institusi kewangan pelaksana melalui kadar pembiayaan konsesi yang lebih murah dari pasaran semasa iaitu sebanyak 3.5% setahun dan tempoh pembiayaan yang lebih panjang selama 40 tahun atau sehingga umur 70 tahun. Kadar pembiayaan yang rendah berserta tempoh pembiayaan yang lebih panjang dapat meningkatkan kemampuan peminjam melalui pengurangan pembayaran bulanan pembiayaan, seterusnya merangsang daya beli dan meningkatkan akses kepada pembiayaan.
2. BNM telah menambah baik ciri-ciri kriteria kelayakan Dana RM1 bilion untuk Rumah Mampu Milik yang bertujuan untuk membantu lebih ramai pembeli rumah daripada golongan berpendapatan rendah membiayai pembelian rumah pertama mereka. Penambahbaikan adalah termasuk pendapatan maksimum bulanan isi rumah dinaikkan sehingga RM4,360 dan harga maksimum harta tanah dinaikkan kepada RM300,000. Penambahbaikan ini telah berkuat kuasa pada 1 September 2019.

Yang di-Pertua,

3. Sejak dilancarkan sehingga 31 Oktober 2019, lebih dari 3,100 permohonan yang bernilai RM596 juta telah diluluskan. Selain akses kepada pembiayaan, pengetahuan kewangan juga penting untuk memastikan bakal pembeli rumah tidak terbeban dengan bayaran bulanan pembiayaan. Modul pendidikan kewangan yang disediakan

NO SOALAN : 1

secara online oleh Agensi Kaunseling dan Pengurusan Kredit (AKPK) iaitu portal Rumahku, juga akan membantu pembeli rumah memahami komitmen kewangan yang bakal dihadapi sebelum membeli rumah. AKPK turut menyediakan program pengurusan kredit untuk semua individu yang memerlukan bantuan dalam mengurus bebanan kredit dengan institusi kewangan.

4. Bagi pembeli yang tidak berjaya mendapatkan pembiayaan, mereka boleh memanfaatkan Khidmat Nasihat Pembiayaan (MyKNP) untuk mendapat penjelasan lanjut berhubung sebab-sebab permohonan tidak berjaya serta khidmat nasihat untuk meningkatkan kelayakan pembiayaan pada masa hadapan.

Sekian, terima kasih.

**PEMBERITAHUAN PERTANYAAN
MESYUARAT KETIGA, PENGGAL KEDUA,
PARLIMEN KEEMPAT BELAS DEWAN RAKYAT**

PERTANYAAN : JAWAB LISAN

**DARIPADA : TUAN LUKANISMAN BIN AWANG
SAUNI [SIBUTI]**

TARIKH : 26.11.2019 (SELASA)

SOALAN

minta **MENTERI PEMBANGUNAN LUAR BANDAR** menyatakan adakah Kementerian bercadang untuk memperkenalkan tong sampah “*Roll On Roll Off*” (RORO Bin) di kawasan penempatan rumah panjang di kawasan luar bandar Sarawak bagi menggalakkan amalan kebersihan yang baik.

JAWAPAN

Tuan Yang di-Pertua,

Untuk Makluman Yang Berhormat, Kementerian Pembangunan Luar Bandar (KPLB) bertekad untuk terus memastikan supaya taraf hidup dan kualiti hidup masyarakat luar bandar menjadi lebih baik dan sejahtera termasuk dalam aspek mengekalkan kelestarian alam sekitar di luar bandar. Justeru, pengurusan sisa pepejal adalah merupakan perkara yang turut diberi perhatian sebagaimana yang digariskan melalui Strategi 1.3: Pengurusan Sisa Pepejal Dan Kumbahan Yang Inovatif Di Luar Bandar di bawah Teras 4: Prasarana Lengkap dan Canggih dalam Dasar Pembangunan Luar Bandar (DPLB) 2030.

Kementerian tidak pernah menggunakan tong sampah “*Roll On Roll Off*” (RORO Bin) bagi mengatasi masalah pengurusan sampah di luar bandar di seluruh Malaysia. Untuk makluman Yang Berhormat, Kementerian sedang dalam proses melatih MPKK bagi menguruskan sisa pepejal di kawasan kampung masing-masing.

NO. SOALAN: 2

Sehingga kini melalui Institut Kemajuan Desa (INFRA), Kementerian telah melatih seramai 150 orang MPKK melalui Modul Pengurusan Sisa Pepejal.

Bagi mengatasi masalah pengurusan sisa pepejal di luar bandar, KPLB bercadang untuk menggunakan teknologi baru mesin pelupusan sampah yang dikenali sebagai *Asher*. Bagi tujuan tersebut, Lembaga Kemajuan Wilayah Kedah (KEDA) telah diberikan tanggungjawab untuk melaksanakan projek rintis di Taman Sejahtera Rakyat, Sungai Toh Pawang, Kuala Muda, Kedah. Projek tersebut telah dilancarkan oleh YB Menteri Pembangunan Luar Bandar pada 10 November 2019. Selain itu, KEDA juga akan menempatkan sebuah mesin *Asher* di Kampung KEDA di Pulau Tuba, Langkawi, Kedah.

Bagi tujuan pengoperasian dan penyelenggaraan, syarikat pengeluar mesin tersebut akan menyediakan latihan kepada pegawai KEDA yang terlibat. KPLB akan menilai keberkesanan projek tersebut sebelum ia diperluaskan ke kawasan luar bandar di seluruh negara termasuk kawasan penempatan rumah panjang di Sarawak sejajar dengan matlamat DPLB.

Kelebihan mesin *Asher* ini adalah ianya menggunakan tenaga solar dan mampu beroperasi selama 24 jam tanpa henti dengan jangka hayat sehingga 10 tahun. Mesin *Asher* berkeupayaan untuk memusnahkan 90% sisa pepejal basah dan kering kecuali besi, aluminium, kaca dan konkrit. Bagi tujuan pengoperasian, mesin tersebut hanya memerlukan seorang pekerja sahaja. Mesin tersebut juga tidak memerlukan ruang/kawasan yang besar untuk beroperasi. Tempoh pelupusan sampah menggunakan mesin ini adalah selama 60 minit. Mesin ini juga mudah untuk diselenggara dan kos penyelenggaraan adalah sebanyak 6% (RM21,900.00) dari harga mesin yang mana harga mesin ini adalah berjumlah RM366,500.00/mesin. Hasil pelupusan mesin boleh dijadikan baja tumbuhan atau batu bata untuk pembinaan. Mesin *Asher* juga telah mendapat pengiktirafan agensi antarabangsa seperti US EPA, SGS, MYCO2, Exova Dubai, CRL Environmental dan UPM Malaysia.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

DARIPADA : PUAN VIVIAN WONG SHIR YEE [SANDAKAN]

TARIKH : 26 NOVEMBER 2019 (SELASA)

SOALAN

PUAN VIVIAN WONG SHIR YEE [SANDAKAN] minta **MENTERI KESIHATAN** menyatakan bagaimana Kementerian Kesihatan dalam menangani isu kekurangan MENTARI di Sabah untuk meningkatkan kesejahteraan sosial rakyat di Sabah.

JAWAPAN

Tuan Yang di-Pertua,

Pusat Kesihatan Mental Masyarakat atau dikenali sebagai MENTARI adalah merupakan suatu pusat sehenti yang diadakan di fasiliti kesihatan / komuniti yang merupakan perluasan skop perkhidmatan kepakaran psikiatri kepada komuniti. Sehingga kini, di seluruh Malaysia, terdapat 25 buah Pusat Kesihatan Mental Masyarakat (MENTARI), seperti mana keperluan di bawah Akta Kesihatan Mental 2001.

Di Sabah, sebuah MENTARI iaitu MENTARI Kota Kinabalu yang bertempat di perkarangan Hospital Mesra Bukit Padang telah diwartakan dan sedang beroperasi manakala dua (2) buah MENTARI lagi iaitu MENTARI Lahad Datu yang menggunakan fasiliti bangunan lama Klinik Kesihatan Silabukan dan MENTARI Tawau di pekarangan Klinik Kesihatan Kubota telah beroperasi dan sedang dalam proses pewartaan.

SOALAN NO : 3

Untuk makluman Yang Berhormat, di dalam usaha untuk menambah bilangan MENTARI di negeri Sabah, Perkhidmatan Psikiatri Hospital Duchess of Kent, Sandakan sedang dalam proses mengenal pasti lokasi yang sesuai untuk dijadikan MENTARI. Perkhidmatan Psikiatri Hospital Mesra dan Hospital Queen Elizabeth juga sedang bekerjasama dengan Universiti Malaysia Sabah (UMS) untuk menubuhkan MENTARI dan sedang di dalam cadangan untuk menggunakan fasiliti UMS bagi tujuan tersebut.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS (2019)**

PERTANYAAN : LISAN

**DARIPADA : YB DATO' HAJI JALALUDDIN BIN HAJI ALIAS
[JELEBU]**

TARIKH : 26 NOVEMBER 2019

SOALAN

Minta **MENTERI PELANCONGAN, SENI DAN BUDAYA** menyatakan berapa jumlah perbelanjaan yang telah dikeluarkan untuk mempromosikan Tahun Melawat Malaysia 2020 dan mengapakah promosi Tahun Melawat Malaysia 2020 ini dilihat kurang memberangsangkan terutamanya di media massa dan media sosial.

JAWAPAN

Tuan Yang di-Pertua,

Kementerian ini telah menerima peruntukan sebanyak RM50 juta untuk pelaksanaan kempen VM2020 bagi tahun 2019. Daripada jumlah tersebut, sebanyak RM34 juta diperuntukkan untuk promosi kempen ini, manakala RM16 juta diperuntukkan untuk pelaksanaan acara-acara di peringkat negeri dan memperkasakan sektor kebudayaan.

Sehingga kini, Tourism Malaysia masih giat mempromosikan kempen VM2020 samada di media massa mahupun di platform-platform media sosial. Mengambil kira kos pengiklanan yang semakin meningkat setiap tahun dan jumlah peruntukan yang terhad, Tourism Malaysia perlu mengambil inisiatif untuk memastikan setiap peruntukan yang diberi dapat menghasilkan keputusan yang optimum kepada industri pelancongan negara.

Justeru itu, bagi mencapai sasaran yang telah ditetapkan, Tourism Malaysia telah mengambil langkah-langkah seperti berikut:

- 1) Menjalinkan kerjasama strategik dengan MasWings, Malaysia Airlines, Air Asia, Firefly, Malindo Air, Malaysia Airports Berhad (MAHB) dan Sharp (M) Electronics.;
- 2) Pengiklanan VM2020 turut dilaksanakan melalui medium *Out Of Home (OOH)* di United Kingdom pada panel keretapi, badan teksi (London Cab), badan bas dan *cross track panels* manakala bagi pasaran Jepun, logo VM2020 dipasang pada billboard di stesen keretapi Shinagawa dan di *flight information board* Lapangan Terbang Fukuoka. Sebanyak enam panel *billboard* VM2020 turut dipasang di Lapangan Terbang Sabiha Gokcen, Istanbul;
- 3) Seterusnya, Kempen VM2020 secara digital bersama Expedia telah dimeterai untuk pasaran Australia, Amerika Syarikat dan Jepun bagi meningkatkan tempahan pakej percutian ke Malaysia;

NO. SOALAN : 4

- 4) Promosi pakej MotoGP Sepang yang merupakan sukan permotoran No.1 di dunia telah dilancarkan di United Kingdom pada Ogos 2019 dengan kolaborasi bersama Petronas Sepang Racing Team (SRT) dan pasukan Redbull KTM Ajo Motorsport yang ditayangkan di 207 negara yang menerima siaran secara langsung; dan
- 5) Promosi dan hebahan publisiti turut diadakan melalui penganjuran Program Lawatan Suaikenal untuk agensi - agensi pelancongan, media antarabangsa dan *bloggers* ke Malaysia.

Tuan Yang di-Pertua,

Promosi di media massa dan media sosial bagi pasaran domestik turut dilaksanakan dengan agresif oleh Tourism Malaysia dengan jalinan kolaborasi dengan media-media utama tempatan melalui publisiti dan slot di media digital, media cetak, TV dan rangkaian radio tempatan, dan program *travelogue* pelancongan.

Tourism Malaysia juga sedang membina laman *microsite* VM2020 dengan sasaran generasi *millennials* yang dijangka siap dalam masa terdekat. Laman web yang berkonsep *user generated* dapat digunakan bagi menyampaikan maklumat mengenai Kempen VM2020 seperti, *signature events* dan *calender of events* VM2020, video Kempen VM2020 dan sebagainya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS
26 NOVEMBER 2019**

PERTANYAAN : LISAN

**DARIPADA : DATUK HAJI HASANUDDIN BIN MOHD YUNUS
[HULU LANGAT]**

TARIKH : 26 NOVEMBER 2019 (SELASA)

Datuk Haji Hasanuddin bin Mohd Yunus [Hulu Langat] minta MENTERI KOMUNIKASI DAN MULTIMEDIA menyatakan adakah Kementerian akan mengkaji semula kadar bayaran kepada penerbit drama/cerekarama dan dokumentari yang tidak sesuai lagi kini kerana kadar terdahulu sudah terlalu lama tidak disemak selain peningkatan kos produksi. Kadar bayaran yang terlalu rendah inilah yang menyebabkan mutu drama di tv menjadi lesu dan hanya berkisar tentang cinta yang membosankan penonton.

JAWAPAN:

1. Kementerian Komunikasi dan Multimedia Malaysia (KKMM) sentiasa mendengar aduan, cadangan dan syor pelbagai pihak di dalam industri demi membantu para pengkarya ini dapat bersaing dan kekal kompetitif dalam penghasilan karya seni. Kementerian menyedari bahawa kadar bayaran ditetapkan pada tahun 1986 dan tidak pernah dikaji semula sehingga kini. (33 tahun)
2. Untuk makluman, KKMM melalui Jabatan Penyiaran Malaysia (RTM) telah memohon kajian kadar bayaran yang disebutkan, dan ia kini dalam penelitian pihak Kementerian Kewangan. Kadar yang dicadangkan adalah peningkatan sebanyak 20-50% mengikut kategori iaitu, Telefilem, Drama Bersiri, Dokumentari/Majalah, Animasi Bersiri, *Variety Show*, Kapsul/Trailer/Promo. Cadangan ini adalah tertakluk kepada kelulusan dari Kementerian Kewangan Malaysia.
3. Dalam menentukan kadar berkenaan, RTM telah melaksanakan perbandingan dengan kadar pihak ketiga (pesaing RTM), dan dapat dipastikan bahawa kadar yang ditawarkan RTM adalah kompetitif.
4. Bagaimanapun ingin ditegaskan bahawa, kualiti karya kreatif yang dibeli RTM tidak berkaitan dengan kadar bayaran yang ditawarkan. Merujuk garis panduan perolehan rancangan, setiap terbitan telah melalui proses kelulusan dan piawaian yang ditetapkan dengan persetujuan pihak RTM dan juga syarikat.

NO SOALAN: 5

5. Produk yang dihasilkan juga mendapat tempat di hati penonton. Sebagai contoh tahun ini, data rating Nielsen Malaysia yang dikeluarkan menunjukkan slot telemovie dan drama seumpama sesetengahnya mencecah 2 juta tontonan bagi slot Citra dan Panggung Seri. Ia bukti tema berkenaan masih menjadi pilihan penonton di negara ini.
6. Kementerian akan sentiasa memastikan kualiti dan mutu program yang disiarkan mengambil kira kebajikan pemain industri kreatif tempatan sentiasa dipelihara dan dilindungi.

PEMBERITAHUAN PERTANYAAN BAGI JAWAB LISAN
DEWAN RAKYAT MALAYSIA

PERTANYAAN : JAWAB LISAN

DARIPADA : YB TUAN AHMAD TARMIZI BIN SULAIMAN [SIK]

TARIKH : 26 NOVEMBER 2019

SOALAN

YB TUAN AHMAD TARMIZI BIN SULAIMAN [SIK] minta **MENTERI LUAR NEGERI** menyatakan langkah yang terkini diambil oleh Kementerian untuk menggerakkan badan dunia dan serantau bagi menyambung pelaksanaan repatriasi pelarian Rohingya untuk kembali ke tanah air mereka di Myanmar.

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Sik atas soalan yang dikemukakan.

Tuan Yang di-Pertua,

2. Malaysia amat prihatin terhadap krisis kemanusiaan Rohingya dan senantiasa mencari peluang untuk membawa isu ini kepada perhatian masyarakat antarabangsa. Dengan usaha-usaha yang berterusan, Malaysia percaya masyarakat dunia akan mengambil tindakan yang berpatutan ke atas ketidakadilan dan krisis kemanusiaan yang dihadapi oleh etnik minoriti Rohingya di Myanmar.

3. Proses repatriasi pelarian Rohingya yang dirancang oleh Kerajaan Myanmar dan Kerajaan Bangladesh gagal menyaksikan penyelesaian yang terbaik bagi masyarakat Rohingya. Ini berikutan kegagalan cubaan untuk menghantar pulang pelarian Rohingya dari Cox's Bazar,

Bangladesh ke Myanmar; pertamanya pada 15 November 2018, dan yang keduanya pada 22 Ogos 2019. Kegagalan ini adalah disebabkan oleh kebimbangan pelarian Rohingya ke atas keselamatan mereka di Myanmar dan tiada jaminan bahawa hak-hak mereka akan terpelihara setelah pulang kelak.

4. Seperti yang Dewan yang Mulia ini sedia maklum, Malaysia terus mengutarakan isu-isu berkaitan krisis Rohingya di peringkat serantau dan antarabangsa. Di peringkat ASEAN, Malaysia sentiasa menggesa Negara-negara Anggota ASEAN untuk mendesak Myanmar dan Bangladesh melaksanakan proses repatriasi.

5. Dalam hal ini, ASEAN telah memainkan peranan melalui *ASEAN Coordinating Centre for Humanitarian Assistance* (AHA Centre) dan *ASEAN Emergency Response and Assessment Team* (ASEAN-ERAT) dengan menjadi pemerhati kepada proses repatriasi yang sepatutnya dilaksanakan pada 22 Ogos 2019. Malaysia telah mengemukakan cadangan agar proses repatriasi dapat dilaksanakan dengan konsultasi bersama pelarian Rohingya. Ini bagi memastikan kepulungan mereka ke Myanmar adalah sebenar-benarnya secara sukarela, selamat dan bermartabat.

6. Seterusnya, di peringkat antarabangsa, Malaysia bukanlah suara yang asing dalam memperjuangkan isu Rohingya. Semasa Perhimpunan Agung ke-74 PBB di New York baru-baru ini, YAB Perdana Menteri telah mengetengahkan isu Rohingya di pelbagai fora termasuklah:

6.1. **Debat Utama Perhimpunan Agung PBB, 27 September 2019**, di mana Malaysia menyatakan tiada negara sekejap Myanmar yang terus menindas etnik Rohingya, dan bersikap tidak mengendahkan tindakan tenteranya melakukan keganasan seksual dan pembunuhan ke atas wanita dan kanak-kanak. YAB Perdana Menteri seterusnya mengkritik ketidakmampuan dunia untuk menghentikan kekejaman ini; dan

6.2. **Acara Sampingan Peringkat Tertinggi: “*Rohingya Crisis – A Way Forward*” pada 24 September 2019**, di mana Malaysia telah mempengerusikan acara ini secara bersama dengan Bangladesh, Turki, Kanada dan Sekretariat OIC. YAB Perdana Menteri telah menyatakan dengan jelas bahawa apa yang berlaku ke atas etnik Rohingya di Myanmar adalah genosid. Repatriasi yang terus tertunda telah menyebabkan pelarian Rohingya di Cox’s Bazar menjadi semakin tertekan dan terdesak. YAB Perdana Menteri menggesa Myanmar untuk membenarkan PBB dan pertubuhan-pertubuhan bukan kerajaan masuk ke Wilayah Rakhine untuk memberikan bantuan dalam proses repatriasi tersebut.

7. YB Menteri Luar Negeri juga turut terlibat dalam konsultasi dengan Negara-negara Ahli PBB dan OIC berkenaan isu Rohingya di sela-sela Perhimpunan Agong PBB, termasuklah:

7.1. **Mesyuarat Koordinasi Menteri-Menteri Luar Negeri OIC, 27 September 2019**, di mana YB Menteri Luar Negeri menekankan bahawa penjenayah yang bertanggungjawab ke atas pelanggaran hak asasi manusia di Wilayah Rakhine perlu dibawa ke muka pengadilan.

7.2. **Mesyuarat Kumpulan Perhubungan OIC Mengenai Masyarakat Islam Rohingya di Myanmar, 25 September 2019**, di mana YB Menteri Luar Negeri mengajak Negara-negara Ahli OIC untuk terus memberikan bantuan kemanusiaan kepada pelarian Rohingya, dan bersama-sama memastikan bahawa proses repatriasi dapat dijalankan dengan sukarela, selamat dan bermartabat.

7.3. **Mesyuarat Ketiga Jawatankuasa Sementara (*Ad-Hoc*) berhubung Akauntabiliti bagi Pencabulan Hak Asasi Manusia Etnik Minoriti Rohingya di Myanmar**, di mana, YB Menteri Luar Negeri mengupas perkara-perkara yang perlu dilaksanakan oleh OIC untuk membawa isu Rohingya ke muka pengadilan antarabangsa.

NO. SOALAN : 6

8. Dalam pada itu, semasa Sesi ke-42 Majlis Hak Asasi Manusia Pertubuhan Bangsa-Bangsa Bersatu (PBB) di Geneva (9 – 27 September 2019), Malaysia telah menaja bersama resolusi “*Situation of Human Rights of the Rohingya Muslims and Other Minorities in Myanmar*,” bersama-sama OIC dan Kesatuan Eropah. Resolusi ini menekankan kepentingan persekitaran yang kondusif untuk membolehkan repatriasi dilaksanakan, serta menekankan agar PBB dapat memainkan peranan dalam membantu menjadikan proses repatriasi ini suatu realiti.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : TUAN AKMAL NASRULLAH BIN MOHD NASIR
[JOHOR BAHRU]**

TARIKH : 26 NOVEMBER 2019 (SELASA)

SOALAN

TUAN AKMAL NASRULLAH BIN MOHD NASIR [JOHOR BAHRU] minta **MENTERI KESIHATAN** menyatakan apakah terdapat sebarang cadangan penguatkuasaan terhadap penggunaan rokok elektronik atau “vape” khususnya dalam kalangan pengguna bawah umur 18 tahun.

JAWAPAN

Tuan Yang di-Pertua,

Rokok elektronik atau Vape merupakan sejenis produk merokok yang baru di masa kini. Masalah penggunaan rokok elektronik atau Vape di Malaysia telah bermula seawal tahun 2013 dan telah memuncak penggunaannya di Malaysia pada tahun 2016. Masalah ini bukan sahaja berlaku di Malaysia malahan ia juga merupakan satu epidemik global yang mengundang kebimbangan pelbagai pihak.

Rokok elektronik atau Vape yang menggunakan cecair bernikotin telah dikawal di bawah Akta Racun 1952. Di bawah Akta ini, sebarang persediaan yang mengandungi nikotin termasuk cecair rokok elektronik adalah dilarang penjualannya kecuali oleh ahli farmasi berlesen dan pengamal perubatan berdaftar. Mana-mana orang selain daripada mereka yang disebut di atas yang menjual sebarang persediaan yang mengandungi nikotin termasuk cecair rokok elektronik bernikotin adalah

SOALAN NO : 7

melakukan satu kesalahan dan boleh didenda tidak melebihi RM3,000 atau penjara tidak melebihi satu tahun atau kedua-duanya sekali.

Pada masa yang sama pengedaran dan pembekalan sebarang persediaan mengandungi nikotin memerlukan pendaftaran dan kelulusan sebagai ubat daripada Pihak Berkuasa Kawalan Dadah, di bawah peruntukan Peraturan-Peraturan Kawalan Dadah dan Kosmetik 1984, Akta Jualan Dadah 1952. Mana-mana orang yang mengedar atau membekalkan sebarang persediaan yang mengandungi nikotin tanpa kelulusan adalah melakukan satu kesalahan dan boleh dihukum dengan denda tidak melebihi RM25,000.00 atau penjara tidak melebihi tiga tahun atau kedua-duanya sekali.

Tuan Yang Di-Pertua,

KKM sedang dalam process menggubal Akta Baru untuk penggunaan semua jenis produk merokok seperti rokok konvensional dan rokok elektronik atau vape dan di bawah Akta ini, bagi mereka yang berumur di bawah 18 tahun adalah dilarang sama sekali.

Menyedari terdapat kajian-kajian terkini yang telah menunjukkan kesan sampingan terhadap penggunaan rokok elektronik dan vape termasuk beberapa kematian yang telah dicatatkan di negara Amerika Syarikat, satu kajian terperinci perlu dibuat untuk mengkaji semula keperluan menguatkuasakan larangan penjualan rokok elektronik dan vape secara menyeluruh. Satu Jawatankuasa Kerja Pakar telah ditubuhkan yang dipengerusikan oleh Timbalan Menteri Kesihatan akan mengkaji semula bentuk kawalan yang akan diambil.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : DATO' DR. MOHD KHAIRUDDIN BIN AMAN
RAZALI
[KUALA NERUS]
TARIKH : 26 NOVEMBER 2019 (SELASA)

SOALAN NO. 8

Y.B. DATO' DR. MOHD KHAIRUDDIN BIN AMAN RAZALI [KUALA NERUS] minta **MENTERI KEWANGAN** menyatakan senarai semua syarikat Menteri Kewangan (Diperbadankan) serta syarikat-syarikat GLIC dan GLC di bawah kawalan Kementerian Kewangan yang dilantik Ketua Pegawai Eksekutif (CEO) yang baharu dan menyatakan perbandingan gaji mereka dengan gaji CEO yang terdahulu.

JAWAPAN

Yang di-Pertua,

Sejak 8 Mei 2018, sebanyak 18 syarikat Menteri Kewangan (Diperbadankan) (MKD) dan syarikat-syarikat GLIC di bawah kawalan Kementerian Kewangan telah menerima Ketua Pegawai Eksekutif (CEO) yang baharu. Syarikat-syarikat tersebut adalah:

Syarikat Menteri Kewangan Diperbadankan (MKD)	Tarikh Lantikan
Bank Pembangunan Malaysia Berhad	8 April 2019
Export-Import Bank Of Malaysia Berhad (EXIM Bank)	1 Julai 2019
Felcra Berhad	22 Oktober 2018
IJN Holdings Sdn Bhd	1 Julai 2018
Indah Water Konsortium Sdn Bhd	19 Ogos 2019
Keretapi Tanah Melayu Berhad (KTMB)	15 Oktober 2019
Khazanah Nasional Berhad	20 Ogos 2018
Malaysia Digital Economy Corporation Sdn Bhd (MDEC)	16 Januari 2019
Mass Rapid Transit Corporation Sdn Bhd (MRT)	1 Februari 2019
PBLT Sdn Bhd	1 November 2019
Pengurusan Aset Air Berhad (PAAB)	19 Mac 2019
Prasarana Malaysia Berhad	3 September 2018
Prokhas Sdn Bhd	1 September 2018
Small Medium Enterprise Development Bank Malaysia Berhad (SME Bank)	3 September 2018
Technology Park Malaysia Corporation Sdn Bhd (TPM)	1 Oktober 2019
UDA Holdings Berhad	22 September 2019

GLIC dibawah kawalan Kementerian Kewangan	Tarikh Lantikan
Kumpulan Wang Amam Persaraan (KWAP)	1 November 2018
Kumpulan Wang Simpanan Pekerja (KWSP)	20 Ogos 2018

Antara 18 lantikan baru ini, gaji bagi 5 CEO telah diturunkan, 4 CEO dinaikkan dan 9 CEO dikekalkan. Jumlah keseluruhan gaji 18 orang CEO baharu ini adalah lebih rendah berbanding dengan jumlah gaji CEO terdahulu. Jumlah penjaminan adalah sebanyak RM87,050 sebulan atau RM1.04 juta setahun.

Perlu ditegaskan bahawa tiada ahli politik telah dilantik sebagai CEO syarikat-syarikat MKD atau GLIC di bawah kawalan Kementerian Kewangan. Tambahan lagi, tiada lantikan politik telah dibuat ke dalam Lembaga Pengarah syarikat-syarikat tersebut, kecuali lantikan YAB Perdana Menteri dan YB Menteri Hal-Ehwal Ekonomi sebagai Ahli Lembaga Pengarah Khazanah Nasional Berhad. Walau bagaimanapun, YAB Perdana Menteri dan YB Menteri Hal-Ehwal Ekonomi tidak menerima sebarang bayaran elaun tahunan dan elaun mesyuarat lembaga pengarah dalam Khazanah Nasional Berhad.

Bagi GLIC pula, satu garis panduan berkaitan ganjaran bagi pengurusan tertinggi syarikat iaitu Buku Biru (Peningkatan Pengurusan Prestasi) telah pun diterbitkan oleh Jawatankuasa Putrajaya bagi Prestasi Tinggi GLC (PCG) pada April 2006. Buku tersebut antara lainnya, telah mencadangkan perkara-perkara berikut:

- i. Memastikan paras gaji asas (*base salary*) tetap kompetitif berbanding pasaran;
- ii. Memastikan kenaikan gaji asas mencerminkan prestasi individu dan syarikat serta kemampuan syarikat;
- iii. Menyandarkan bonus dan jumlah ganjaran kepada prestasi individu dan syarikat;
- iv. Memastikan keseluruhan ganjaran adalah kompetitif di pasaran;
- v. Penggunaan wang tunai sebagai ganjaran/ insentif; dan

vi. Penggunaan saham sebagai ganjaran/ insentif.

Dalam usaha bagi memastikan calon CEO yang dilantik merupakan individu yang berwibawa, kompeten dan berpengalaman luas serta relevan dalam menerajui syarikat Kerajaan, bayaran gaji yang kompetitif turut dipertimbangkan bagi menarik individu yang mempunyai kriteria *fit dan proper* (dengan izin) ini.

Dan tentu, ia adalah lain daripada apa yang dibayar untuk elaun kepada bekas Ketua Setiausaha Perbendaharaan sehingga beliau boleh dapat tambahan gaji RM56,000 sebulan atau ganjaran tambahan sebanyak RM3.8 juta di antara tahun 2012 kepada Jun 2018.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS (2019)**

PERTANYAAN : LISAN
DARIPADA : YB. PUAN NOORITA BINTI SUAL [TENOM]
TARIKH : 26 NOVEMBER 2019

SOALAN

Minta **MENTERI PELANCONGAN, SENI DAN BUDAYA MALAYSIA** menyatakan apakah Pakej Pelancongan istimewa dan kerjasama pintar dengan persatuan pengusaha pelancongan, syarikat penerbangan dan badan korporat bagi mempromosikan pelancongan negeri Sabah, terutama Parlimen Tenom sempena Tahun Melawat Malaysia 2020.

JAWAPAN

Tuan Yang di-Pertua,

Taman Pertanian Sabah di Lagud Seberang merupakan pusat tarikan pelancongan utama bagi Daerah Tenom. Selain itu, disini juga terdapat banyak produk pelancongan sampingan yang menjadi produk sokongan kepada Taman Pertanian Sabah ini.

Untuk makluman Ahli Yang Berhormat, pendekatan strategik bagi mempromosikan daerah ini kepada pelancong domestik dan antarabangsa adalah seperti berikut:

1) Lawatan Suai Kenal

TM dengan kerjasama Sabah Tourist Association (STA) telah menjemput agensi-agensi pelancongan, syarikat-syarikat korporat dan media untuk menyertai lawatan suai kenal bagi memperkenalkan produk-produk pelancongan, acara-acara tempatan dan kemudahan-kemudahan pelancongan yang terdapat

di Daerah Tenom. Seramai 33 orang wakil daripada agensi pelancongan, syarikat korporat dan media telah menyertai lawatan ini. Antara produk pelancongan yang dilawati adalah Pusat Kebudayaan Murut, Kilang Kopi Fatt Choi, Ladang Limau Bali, Taman Pertanian Tenom dan tempat-tempat aktiviti pelancongan lain yang terdapat di sini.

2) Melalui Pembangunan Pakej

Sebanyak 5 pakej pelancongan utama Daerah Tenom turut dimuatkan di Buku “Best of Sabah Holiday Packages 2019/2020” yang telah dilancarkan oleh YAB Ketua Menteri Sabah sempena Kempen Melawat Malaysia 2020 (VM2020) pada 19 September 2019. Pakej-pakej ini akan dipromosi melalui *website & microsite* Tourism Malaysia dan juga akan diedarkan kepada pasaran yang telah disasarkan.

3) Bantuan Acara-Acara Promosi Negeri

Bagi acara-acara lain di Sabah, aktiviti promosi diterajui oleh kerajaan negeri Sabah melalui Sabah Tourism Board, namun demikian Tourism Malaysia Sabah turut membantu dalam mempromosikan acara Pesta Kalimantan melalui pembangunan pakej pelancongan, bahan-bahan kolateral, hebahan melalui media cetak, sosial dan sebagainya.

Sekian, terima kasih.

**PEMBERITAHUAN PERTANYAAN
MESYUARAT KETIGA, PENGGAL KEDUA
PARLIMEN KEEMPAT BELAS DEWAN RAKYAT**

PERTANYAAN : JAWAB LISAN

**DARIPADA : TUAN YUSUF BIN ABD. WAHAB
[TANJONG MANIS]**

TARIKH : 26.11.2019 (SELASA)

SOALAN NO. 10

minta **MENTERI PEMBANGUNAN LUAR BANDAR** menyatakan berapakah jumlah rumah kampung dan rumah panjang yang telah dan akan dibaik pulih di Parlimen Tanjong Manis dalam tahun 2019. Apakah bantuan baik pulih ini masih diteruskan.

JAWAPAN

Tuan Yang di-Pertua,

Untuk makluman Yang Berhormat, Program Perumahan Rakyat Termiskin (PPRT) merupakan usaha Kerajaan bagi membolehkan rakyat mendiami rumah yang lebih selamat dan selesa kepada kumpulan sasar golongan miskin dan miskin tegar di kawasan luar bandar. Program ini masih diteruskan bagi tahun 2019 di seluruh negara dan tertakluk kepada peruntukan yang diluluskan.

Keutamaan bantuan PPRT adalah bagi pembaikan atau pembinaan rumah individu / rumah kampung yang daif manakala bagi kategori rumah panjang, Kementerian hanya menumpukan kepada bantuan baik pulih sahaja dan dilaksanakan dengan kerjasama Pejabat Daerah di Sarawak.

Sebanyak RM9.93 juta diperuntukkan untuk bantuan baik pulih rumah panjang daripada keseluruhan peruntukan baik pulih rumah di Sarawak berjumlah RM29 juta untuk tahun 2019. Pelaksanaan bantuan

NO. SOALAN : 10

ini diselaraskan bersama dengan pihak Kementerian Pemodenan Pertanian, Tanah Adat dan Pembangunan Wilayah Sarawak (MANRED).

Bagi Parlimen Tanjung Manis, Kementerian hanya menerima permohonan pembaikan dan bina baharu untuk rumah individu/ rumah kampung sahaja. Tiada permohonan untuk baik pulih rumah panjang diterima setakat ini. Pelaksanaan projek PPRT tahun 2019 bagi Parlimen Tanjung Manis melibatkan pembinaan rumah baharu sebanyak 8 unit dan pembaikan rumah daif individu / rumah kampung sebanyak 43 unit dengan peruntukan berjumlah RM1,125,000.00 iaitu sebanyak RM480,000.00 diperuntukkan untuk bina baharu dan sebanyak RM645,000.00 diperuntukkan untuk baik pulih. Kesemua projek tersebut masih dalam pelbagai peringkat pelaksanaan dan dijangka siap pada akhir tahun 2019.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN JUGAH ANAK MUYANG @
TAMBAT [LUBOK ANTU]**

TARIKH : 26 NOVEMBER 2019 (SELASA)

SOALAN NO. 11

Tuan Jugah anak Muyang @ Tambat [Lubok Antu] minta **MENTERI KOMUNIKASI DAN MULTIMEDIA** menyatakan adakah Kementerian ada menyediakan rangka kerja bagi penambahan pencawang telekomunikasi di kawasan Nanga Kumpang, Jelukong, Merio Tambak, SK Batang Ai, Ensawang, Kumpang Paoh, Kumpang Langgir, Ulu Engkari, Nanga Entalau Skrang dan Nanga Menjuau Skrang yang mana kawasan ini tidak mendapat liputan telekomunikasi dengan baik.

JAWAPAN

Tuan Yang di-Pertua,

1. Pihak Kerajaan sentiasa memberi tumpuan kepada pembangunan infrastruktur komunikasi yang komprehensif merangkumi penyediaan liputan jalur lebar talian tetap dan mudah alih yang dapat memberi perkhidmatan komunikasi yang lebih menyeluruh, stabil dan berkualiti di seluruh negara terutamanya di kawasan luar bandar dan pedalaman.
2. Untuk memastikan liputan jalur lebar dapat disediakan kepada hampir semua penduduk, Pelan Gentian Optik dan Kesalinghubungan Negara (atau National Fibreisation and Connectivity Plan, ("NFCP")) mensasarkan 98% kawasan berpenduduk di Malaysia akan mendapat

kelajuan purata 30Mbps menjelang tahun 2023 dengan menggunakan teknologi yang bersesuaian di seluruh negara.

3. Pelaksanaan NFCP memberi keutamaan kepada penyediaan teknologi gentian optik agar Rakyat boleh menikmati perkhidmatan jalur lebar berkelajuan tinggi dengan kualiti yang lebih baik. Walau bagaimanapun, bagi kawasan-kawasan yang memiliki kekangan seperti bentuk muka bumi dan sebagainya yang menghalang penyediaan teknologi gentian optik, pembinaan menara komunikasi bagi menyediakan teknologi tanpa wayar akan dipertimbangkan. Sekiranya kos yang sangat tinggi dan tempoh masa yang lama diperlukan untuk menyediakan teknologi gentian optik serta tanpa wayar, teknologi lain seperti perkhidmatan satelit akan digunakan bagi memastikan kesalinghubungan digital dapat dinikmati oleh segenap pelosok Rakyat di seluruh negara.

Tuan Yang di-Pertua

4. Berdasarkan semakan yang telah dijalankan oleh Suruhanjaya Komunikasi dan Multimedia Malaysia (SKMM), telah terdapat sebanyak 23 menara komunikasi baharu telah siap beroperasi di kawasan Lubok Antu. Manakala, sebanyak 28 lokasi menara telah dinaiktaraf kepada perkhidmatan 3G dan 4G. Untuk perkhidmatan talian tetap sebanyak 136 sambungan telah tersedia. Dengan adanya infrastruktur ini, penduduk-penduduk di kawasan-kawasan berikut, Ensawang, Jelukong, Kampung Langgir, Kumpang Paoh, Nanga Entalau Skrang, Nanga Kumpang dan Sk Batang Ai, dapat menikmati perkhidmatan jalur lebar.

5. Manakala di kawasan Merio Tambak, Nanga Menjau Skrang dan Ulu Engkari tidak terdapat liputan buat masa ini memandangkan kawasan-kawasan ini terpencil dan belum mempunyai kemudahan infrastruktur asas untuk menyokong pembinaan menara pencawang komunikasi. Kementerian melalui SKMM akan terus menjalankan kajian berkaitan keperluan liputan selular dan jalur lebar di sekitar kawasan tersebut dan mempertimbangkan untuk dimasukkan ke dalam perancangan inisiatif-inisiatif infrastruktur di bawah NFCP.

SOALAN NO : 11

6. Ia juga memerlukan kerjasama serta tindakan beberapa pihak berkepentingan lain terutamanya pihak Kerajaan Negeri. Selain dari itu, pihak Sarawak Multimedia Authority (SMA) yang menerajui dan memudahkan pembangunan dan pelaksanaan inisiatif komunikasi, multimedia dan ekonomi digital negeri perlu memainkan peranan bagi merealisasikan jaringan komunikasi yang baik di kawasan ini. Pada masa ini, SKMM sedang bekerjasama dengan pihak SMA untuk mengenalpasti keperluan dan menyelaraskan inisiatif jalur lebar di negeri Sarawak bagi mengelakkan pertindihan lokasi pelaksanaan.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : DATO' DR. HAJI NOOR AZMI BIN GHAZALI
[BAGAN SERAI]**

TARIKH : 26 NOVEMBER 2019 (SELASA)

SOALAN

DATO' DR. HAJI NOOR AZMI BIN GHAZALI [BAGAN SERAI] minta **MENTERI KESIHATAN** menyatakan berapa bilangan graduan kedokteran yang telah diambil bekerja secara kontrak dan apakah nasib mereka atau bagaimana Kementerian membantu mereka selepas kontrak tamat.

JAWAPAN

Tuan yang Dipertua,

Sehingga 11 November 2019 seramai 17,183 orang Pegawai Perubatan UD41 telah dilantik secara kontrak sejak tahun 2016 dan daripada jumlah tersebut seramai 6,139 orang Pegawai Perubatan UD41 telah dilantik secara kontrak bagi tahun 2019.

Pegawai Perubatan UD41 telah dilantik secara kontrak bagi menjalani latihan siswazah dan khidmat wajib mulai tahun 2016 bagi memenuhi keperluan Akta Perubatan 1971 dan profesion sebelum diberikan Sijil Pendaftaran Penuh sebagai Pegawai Perubatan berdaftar.

Bagi memastikan graduan mendapat pendedahan yang mencukupi, Kerajaan mensyaratkan untuk graduan melengkapkan khidmat wajib untuk tempoh selama dua (2) tahun. Justeru, tempoh maksimum kontrak adalah selama lima (5) tahun merangkumi khidmat wajib dan housemanship (latihan siswazah).

SOALAN NO : 13

Kerajaan akan melantik bakat terbaik yang memenuhi syarat skim perkhidmatan dan kriteria khusus yang ditetapkan selepas 2 atau maksimum 3 tahun untuk diberi pertimbangan ke lantikan tetap bagi memenuhi keperluan perkhidmatan, tertakluk kepada kekosongan jawatan.

Berikutan pertambahan dalam jumlah keluaran graduan, Kerajaan tidak dapat menyediakan peluang pekerjaan sepenuhnya kepada graduan-graduan kerana perjawatan diwujudkan berdasarkan keperluan fasiliti kesihatan sahaja.

Pegawai Perubatan Gred UD41 (Kontrak) yang telah tamat latihan siswazah, mendapat Pendaftaran Penuh dan melengkapkan khidmat wajib tetapi tidak dilantik tetap ke sektor awam, berpeluang untuk bekerja di agensi lain dalam sektor awam seperti di hospital-hospital universiti, sektor swasta dan syarikat yang memerlukan pengetahuan dan kemahiran dalam bidang kesihatan seperti makmal perubatan swasta, syarikat farmaseutikal dan lain-lain.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS (2019)**

PERTANYAAN : LISAN

**DARIPADA : YB TUAN SIVAKUMAR VARATHARAJU
NAIDU [BATU GAJAH]**

TARIKH : 26 NOVEMBER 2019

SOALAN

Minta **MENTERI PELANCONGAN, SENI DAN BUDAYA** menyatakan secara terperinci mengenai aktiviti pelancongan di negeri Perak dari segi jumlah pelancong dan keuntungan yang diperoleh. Apakah usaha yang telah diambil oleh Kerajaan untuk menaik taraf dan memajukan destinasi atau pusat-pusat pelancongan di negeri Perak.

JAWAPAN

Tuan Yang di-Pertua,

Merujuk kepada Survei Pelancongan Domestik yang telah dibuat oleh Jabatan Perangkaan Malaysia, Negeri Perak telah menerima seramai 7.56 juta pelancong domestik untuk tahun 2018 iaitu penurunan sebanyak 1.0% berbanding seramai 7.64 juta untuk tahun 2017. Manakala jumlah pendapatan pelancongan domestik bagi Negeri Perak juga mencatatkan penurunan sebanyak 4.1% iaitu RM 6.47 billion untuk tahun 2018 berbanding RM 6.74 billion untuk tahun 2017. Selain itu, lima (5) destinasi tumpuan utama pelancong domestik ke Perak pada tahun 2018 adalah di Pulau Pangkor, Teluk Intan, Taman Tasik Taiping, Tambun dan Lumut.

NO. SOALAN : 9

Kementerian Pelancongan, Seni Dan Budaya juga telah memperuntukkan sebanyak RM 59.92 juta di bawah Rancangan Malaysia Kesebelas (RMKe-11) bagi melaksanakan sebelas (11) projek pembangunan dan menaik taraf di Perak seperti berikut:

BIL	NAMA PROJEK	KOS (RM)
1	Pembangunan Rumah Lat dan Galeri Di Batu Gajah	5.0 juta
2	Pembangunan Ecotourism di Pusat Eko-Pelajaran Hutan Paya Laut Matang	1.96 juta
3	Pembangunan Ecotourism Lata Tebing Tinggi, Selama	1.0 juta
4	Kerja-Kerja Baik Pulih dan Penstabilan Cerun Gua Tempurung	880 ribu
5	Pembaikan Kompleks Sejarah Pasir Salak	100 ribu
6	Projek Peningkatan Kemudahan Pelancongan Di Pulau Sembilan	250 ribu
7	Projek Membina Bangunan Arkib Negara Malaysia Cawangan Negeri Perak	30.0 juta
8	Pengambilan Tanah Tapak Warisan Dunia Lembah Lenggong Di Bukit Bunuh Dan Bukit Jawa, Lenggong	12.41 juta
9	Menaiktaraf Tapak Arkeologi Paleolitik Kota Tampan (KT 1987), Lenggong	3.3 juta

BIL	NAMA PROJEK	KOS (RM)
10	Naiktaraf Galeri Arkeologi Lembah Lenggong (Fasa 2)	5.0 juta
11	Naik Taraf Dewan Orang Ramai Homestay Klah	20 ribu
JUMLAH		59.92 juta

Kementerian sentiasa bekerjasama erat dengan Unit Perancang Ekonomi Negeri (UPEN) Perak dalam memberi perhatian kepada produk-produk pelancongan yang berpotensi untuk dibangunkan atau dinaiktaraf. Sehubungan itu, Kementerian sangat mengalu-alukan cadangan daripada Yang Berhormat demi memajukan produk-produk pelancongan di Perak.

Bagi tujuan tersebut, Ahli Yang Berhormat disyor untuk mengemukakan sebarang cadangan dan membuat permohonan melalui UPEN Perak untuk diteliti berdasarkan keutamaan. Permohonan yang dikemukakan kepada UPEN Perak seterusnya akan diselaraskan oleh pihak Kementerian sebelum diperakukan untuk pertimbangan Kementerian Hal Ehwal Ekonomi (MEA).

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : DATIN MASTURA BINTI MOHD YAZID
[KUALA KANGSAR]**

TARIKH : 26 NOVEMBER 2019 (SELASA)

SOALAN

DATIN MASTURA BINTI MOHD YAZID [KUALA KANGSAR] minta **MENTERI KESIHATAN** menyatakan bagaimanakah kerjasama Kementerian dengan Kementerian Pendidikan dapat membendung pelajar-pelajar sekolah daripada membeli rokok elektronik (vape) secara efektif memandangkan penjual-penjual vape terlalu ramai dan sebahagiannya mungkin tidak berdaftar sebagai penjual vape secara sah.

JAWAPAN

Tuan Yang di-Pertua,

Rokok elektronik atau Vape merupakan sejenis produk merokok yang baru di masa kini. Masalah penggunaan rokok elektronik atau Vape di Malaysia telah bermula seawal tahun 2013 dan telah memuncak penggunaannya di Malaysia pada tahun 2016. Masalah ini bukan sahaja berlaku di Malaysia malahan ia juga merupakan satu epidemik global yang mengundang kebimbangan pelbagai pihak.

Pihak Kementerian Kesihatan Malaysia (KKM) telah mengadakan sesi perbincangan bersama pihak Kementerian Pendidikan Malaysia (KPM) bagi membincangkan strategi dan langkah-langkah untuk memastikan masalah penggunaan rokok elektronik atau vape di kalangan pelajar sekolah dapat dibendung.

Untuk makluman juga, KKM sedang dalam proses menggubal Akta Baru untuk penggunaan semua jenis produk merokok seperti rokok konvensional dan rokok elektronik atau vape dan di bawah Akta ini, bagi mereka yang berumur di bawah 18 tahun adalah dilarang sama sekali. Menyedari terdapat kajian-kajian terkini yang telah menunjukkan kesan sampingan terhadap penggunaan rokok elektronik dan vape termasuk beberapa kematian yang telah dicatatkan di negara Amerika Syarikat, satu kajian terperinci perlu dibuat untuk mengkaji semula keperluan menguatkuasakan larangan penjualan rokok elektronik dan vape secara menyeluruh. Satu Jawatankuasa Kerja Pakar telah ditubuhkan yang dipengerusikan oleh Timbalan Menteri Kesihatan akan mengkaji semula bentuk kawalan yang akan diambil.

Di bawah peruntukan Akta Racun 1952 juga, Bahagian Penguatkuasaan Farmasi telah menjalankan tindakan penguatkuasaan di seluruh Malaysia pada 20 Ogos 2019. Penguatkuasaan ini adalah menumpukan kedai-kedai penjualan rokok elektronik atau vape berhampiran sekolah serta yang menjadi akses kepada pelajar seperti di kedai-kedai runcit, kedai gajet dan kedai peralatan rokok elektronik. Sebanyak 81 buah premis telah diserbu oleh pegawai penguatkuasa KKM dan 68,128 botol cecair yang mengandungi nikotin telah dirampas dengan jumlah rampasan adalah sebanyak RM1.45 juta. Penguatkuasaan terhadap orang bawah umur yang menggunakan rokok elektronik juga dijalankan serentak semasa operasi berkenaan dan satu notis kesalahan di bawah Peraturan 13, Peraturan-Peraturan Kawalan Hasil Tembakau (PPKHT) 2004 telah dikeluarkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

DARIPADA : DATO' SRI HASAN BIN ARIFIN [ROMPIN]

TARIKH : 26 NOVEMBER 2019 [SELASA]

SOALAN

Minta **MENTERI PERUMAHAN DAN KERAJAAN TEMPATAN** menyatakan ketika ini Kementerian telah membenarkan penubuhan Syarikat Koridor Utiliti di negeri-negeri "sebagai penghubung di antara Majlis Daerah dengan swasta". Langkah ini sedikit sebanyak telah membebankan pemaju-pemaju kerana mereka mengenakan bayaran perkhidmatan yang agak tinggi sedangkan untuk mendapatkan kelulusan, pemaju-pemaju terpaksa membuat perkiraan sendiri dan tidak membantu kepada pemaju-pemaju perumahan.

JAWAPAN

Tuan Yang di-Pertua,

1. Untuk makluman Yang Berhormat, secara dasarnya objektif penubuhan syarikat koridor utiliti di negeri-negeri adalah bertujuan untuk menyelaraskan penyediaan kemudahan utiliti dan lebih bersistematik, terancang, menyeluruh dan memenuhi keperluan pengguna bagi menyokong aktiviti ekonomi untuk lebih berdaya saing. Syarikat-syarikat ini ditubuhkan atau dilantik mengikut bidang kuasa Kerajaan Negeri dan tidak melibatkan kawal seliaan Kementerian Perumahan dan Kerajaan Tempatan (KPKT).

2. Manakala dari aspek perundangan sebagaimana undang-undang yang dikuatkuasakan oleh Pihak Berkuasa Tempatan (PBT) di bawah Akta Jalan, Parit dan Bangunan 1974 (Akta 133), tiada peruntukan kuasa diberi kepada syarikat-syarikat untuk memberi kelulusan dan mengenakan bayaran terutama dalam penyelenggaraan rizab-rizab awam seperti jalan, kawasan lapang, parit dan lain-lain. Segala bentuk bayaran yang dikenakan oleh syarikat koridor utiliti tidak mempunyai kaitan dengan kelulusan yang dikeluarkan oleh PBT. Selain itu, pihak KPKT juga tidak mempunyai kuasa sama ada untuk menggalakkan atau menghalang mana-mana pemaju dari menggunakan perkhidmatan syarikat koridor utiliti di negeri-negeri yang menawarkan perkhidmatan tersebut.

3. Untuk makluman Yang Berhormat juga, beberapa Kerajaan Negeri yang dikenal pasti menubuhkan syarikat koridor utiliti ialah:

- (a) Negeri Melaka melalui penubuhan Bahagian Koridor Infrastruktur & Impak Sosial (BKI);
- (b) Negeri Pahang melalui penubuhan syarikat Koridor Utiliti Pahang; dan
- (c) Negeri Johor melalui penubuhan Koridor Utiliti (Johor) Sdn. Bhd.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : DATUK HAJAH AZIZAH BINTI DATUK SERI
PANGLIMA HAJI MOHD DUN [BEAUFORT]**

TARIKH : 26 NOVEMBER 2019 (SELASA)

SOALAN

DATUK HAJAH AZIZAH BINTI DATUK SERI PANGLIMA HAJI MOHD DUN [BEAUFORT] minta **MENTERI KESIHATAN** menyatakan sejauh manakah perkembangan Program PeKa B40 dan setakat ini berapakah bilangan terkini yang mendapat manfaat daripada program ini khususnya di negeri Sabah.

JAWAPAN

Tuan Yang di-Pertua,

Skim Peduli Kesihatan untuk Kumpulan B40 atau dikenali sebagai PeKa B40 telah dilaksanakan di seluruh Negara sebagai projek perintis bermula 15 April 2019. Skim ini memberi fokus kepada saringan kesihatan bagi penyakit tidak berjangkit. Empat (4) pakej manfaat yang ditawarkan adalah:

- a) Saringan Kesihatan;
- b) Bantuan Alat Perubatan;
- c) Insentif Melengkapkan Rawatan Kanser; dan
- d) Insentif Tambang Pengangkutan.

Penerima Bantuan Sara Hidup (BSH) yang berumur 50 tahun ke atas dan pasangannya yang berdaftar adalah layak secara automatik menyertai skim ini. PeKa B40 dilaksanakan dengan kerjasama klinik

perubatan swasta yang berminat dan enam (6) makmal swasta berangkaian yang dikontrak. Sehingga 24 September 2019, sebanyak 1,430 buah klinik perubatan swasta telah berdaftar sebagai Klinik PeKa B40. Seramai 88,844 orang penerima BSH termasuk pasangan mereka yang berdaftar, berumur 50 tahun dan ke atas telah menjalani saringan kesihatan di bawah PeKa B40. Sehingga 1 September 2019, seramai 655 orang menerima manfaat 2, seramai 229 orang telah menerima manfaat 3 dan seramai 703 orang telah menerima manfaat 4.

Tuan Yang di-Pertua,

Untuk makluman, di negeri Sabah jumlah keseluruhan penerima BSH yang berumur 50 tahun dan ke atas adalah seramai 293,763 orang. Bagi projek perintis ini, dengan peruntukan RM100 juta untuk seluruh Negara, maka adalah dianggarkan seramai 59,613 orang rakyat negeri Sabah berpeluang menjadi penerima manfaat PeKa B40 berdasarkan konsep '*first come, first serve*' (dengan izin). Sehingga 24 September 2019, seramai 7,550 orang penerima manfaat di Sabah telah menjalani saringan kesihatan di bawah PeKa B40. Ini menjadikan Sabah negeri kelima tertinggi mengecapi saringan kesihatan selepas Sarawak, Kedah, Pulau Pinang dan Perak.

Kementerian Kesihatan Malaysia (KKM) kini sedang giat mempertingkatkan aktiviti promosi dan publisiti PeKa B40 sama ada melalui media cetak, elektronik, media sosial dan komunikasi bersemuka. KKM juga telah mengambil langkah proaktif dengan melaksanakan saringan kesihatan secara '*outreach*' (dengan izin). Aktiviti ini melibatkan kerjasama antara agensi-agensi Kerajaan yang berkait rapat dengan kumpulan B40 seperti Lembaga Kemajuan Tanah Persekutuan (FELDA), Lembaga Kemajuan Ikan Malaysia (LKIM), Jabatan Kebajikan Masyarakat dan Majlis Pengurusan Komuniti Kampung.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN
DARIPADA : YB TUAN ABDUL LATIFF BIN ABDUL RAHMAN
KAWASAN : KUALA KRAI
TARIKH : 26 NOVEMBER 2019 (SELASA)

SOALAN :

YB TUAN ABDUL LATIFF BIN ABDUL RAHMAN minta **MENTERI KERJA RAYA** menyatakan bilakah Lebuhraya Central Spine Road (CSR) akan siap sepenuhnya dan berapa peratuskah pembinaannya sehingga sekarang.

JAWAPAN :

Tuan Yang Di-Pertua,

Untuk makluman Ahli Yang Berhormat, Projek *Central Spine Road* (CSR) dari Kuala Krai, Kelantan ke Simpang Pelangai, Pahang sepanjang 346.3km telah pun dimulakan secara berperingkat dalam Rancangan Malaysia Kesembilan (RMKe-9) dan dibahagikan kepada enam (6) pakej utama iaitu:

- 1) Pakej 1: Kuala Krai ke Jambatan Sungai Lakit, Kelantan (47km);
- 2) Pakej 2: Jambatan Sungai Lakit ke Gua Musang, Kelantan (59km);
- 3) Pakej 3: Gua Musang ke Kampung Relong, Kuala Lipis, Pahang (93.8km);
- 4) Pakej 4: Kampung Relong, Kuala Lipis ke Raub, Pahang (45km);
- 5) Pakej 5: Raub ke Bentong, Pahang (54km); dan
- 6) Pakej 6: Bentong ke Simpang Pelangai, Pahang (47.5km).

Projek CSR dilaksanakan secara berperingkat berdasarkan keutamaan kepada aspek keselamatan dan kesesakan lalu lintas. Sehingga kini, jajaran sepanjang 184.6km telah diluluskan untuk pelaksanaan iaitu 167.1km di Negeri Pahang (Pakej 3, 4 dan 5) dan 17.5km di Negeri Kelantan (Pakej 3). Status projek yang telah diluluskan untuk pelaksanaan adalah seperti berikut:

Sehingga kini, jajaran di Pakej 3 iaitu dari Mentara Kampung Seberang Jelai, Pahang sepanjang 55.25km telah siap dan dibuka kepada pengguna. Jajaran sepanjang 5.78km di Pakej 5 iaitu dari Kampung Asap ke Kampung Sertik juga telah siap pembinaan pada Oktober 2018.

Jajaran yang sedang **dalam pembinaan** pula adalah sepanjang 64.52km iaitu:

Pakej 3

1) Seksyen 3D dari Bulatan Gua Musang ke Mentara, Kelantan sepanjang 10.5km yang telah dimulakan pada April 2018 dan dijadualkan siap pada Oktober 2022. Kemajuan semasa adalah sebanyak 9%.

2) Seksyen 3E1 dari Mentara ke Merapoh, Pahang sepanjang 5.8km yang telah dimulakan pada September 2016 dan dijadualkan siap pada Februari 2020. Kemajuan semasa adalah sebanyak 90%.

Pakej 5

1) Seksyen 5A Raub Bypass sepanjang 9.6km yang telah dimulakan pada Jun 2016 dan dijadualkan siap pada Jun 2022. Kemajuan semasa adalah sebanyak 0.52%.

2) Seksyen 5B dari Kampung Orang Asli Sungai Chandan ke Kampung Asap sepanjang 16km yang telah dimulakan pada Mac 2018 dan dijadualkan siap pada Mac 2021. Kemajuan semasa adalah sebanyak 28.5%.

3) Seksyen 5C2 dari Kampung Asap ke Kampung Sertik dan Seksyen 5D Bentong Bypass sepanjang 22.7km yang telah dimulakan pada April 2016 dan dijadualkan siap pada September 2020. Kemajuan semasa adalah sebanyak 89%.

Jajaran yang sedang **dalam peringkat perolehan** pula adalah sepanjang 33.4km iaitu:

Pakej 3

1) Seksyen 3B & 3C dari KM180.5 FT08 ke Bulatan Gua Musang sepanjang 7km yang dijangka akan mula pembinaan pada suku keempat tahun 2019.

2) Seksyen 3J dari Kampung Seberang Jelai ke Kampung Relong sepanjang 6.95km yang juga dijangka akan mula pembinaan pada suku keempat tahun 2019.

Pakej 4

1) Seksyen 4C dari Segi Lama ke Kuala Dong sepanjang 5.8km yang kini dalam peringkat perancangan untuk ditender.

2) Seksyen 4D dari Kuala Dong ke Kampung Tanah Bercangkul sepanjang 13.6km telah ditender pada 13 September 2019.

Seterusnya, jajaran yang sedang **dalam peringkat perancangan** pula adalah sepanjang 25.25km iaitu:

Pakej 4

1) Seksyen 4A dari Kampung Relong ke Penjom sepanjang 15km yang kini dalam peringkat perancangan Makmal Pengurusan Nilai peringkat Kejuruteraan Nilai.

2) Seksyen 4B Benta Bypass sepanjang 10.25km kini dalam peringkat rekabentuk terperinci.

Baki pakej yang masih belum dilaksanakan untuk Projek CSR dirancang untuk dilaksanakan dalam tempoh *Rolling Plan* dan Rancangan Malaysia yang seterusnya, tertakluk kepada kelulusan peruntukan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

DARIPADA : TUAN HAJI AWANG BIN HASHIM [PENDANG]

TARIKH : 26 NOVEMBER 2019 [SELASA]

SOALAN NO. 24

Minta **MENTERI PERUMAHAN DAN KERAJAAN TEMPATAN** menyatakan :

- (a) statistik kediaman mewah, kos sederhana dan kos rendah yang tidak terjual; dan
- (b) justifikasi penganjuran Kempen Pemilikan Rumah (HOC) kepada warga asing bagi menyelesaikan isu lambakan rumah mewah tidak terjual.

JAWAPAN

Tuan Yang di-Pertua,

Jawapan (a)

1. Untuk makluman Yang Berhormat, Laporan Maklumat Harta Tanah Siap Dibina Tidak Terjual Suku Kedua Tahun 2019 yang diterbitkan oleh Pusat Maklumat Harta Tanah Negara (NAPIC) adalah sebagaimana di jadual berikut:

**UNIT RUMAH SIAP DIBINA TIDAK TERJUAL
MENGIKUT KATEGORI HARGA (SUKU KEDUA TAHUN 2019)**

KATEGORI HARGA	UNIT DILANCARKAN	UNIT TIDAK TERJUAL		NILAI TIDAK TERJUAL (RM JUTA)
		BIL.	%	
BAWAH RM300,000	39,787	11,511	28.9	2,279
RM300,001 -RM500,000	29,946	8,788	29.3	3,387
RM500,001 -RM700,000	25,128	5,217	20.8	3,117
RM700,001 -RM1000,000	14,011	3,081	22.0	2,585
ATAS RM1,000,000	15,252	4,213	27.6	8,391
JUMLAH	124, 124	32,810	26.4	19,760

Jawapan (b)

1. Untuk makluman yang terhormat, Kempen Pemilikan Rumah (HOC) merupakan program yang diperuntukkan kepada rakyat Malaysia sahaja bagi memiliki kediaman dengan insentif yang diberikan oleh Kerajaan dan diskaun daripada pihak pemaju. Manakala melalui program *Malaysia My Second Home* (MM2H), Kerajaan Malaysia menyediakan satu inisiatif untuk menarik dan menawarkan peluang kepada warganegara asing yang mempunyai kemampuan kewangan yang tinggi serta memenuhi syarat untuk menetap dan merencanakan

ekonomi di Malaysia melalui subsektor pelaburan, hartanah, pendidikan, perubatan dan automobil.

2. Berdasarkan data Pusat Maklumat Harta Tanah Negara (NAPIC) terdapat 4,213 (12.8%) rumah mewah berharga RM1 juta ke atas dengan nilai RM8.3 bilion tidak terjual di negara ini. Sehubungan itu, penjualan rumah mewah kepada warga asing dapat mengurangkan lambakan unit rumah mewah sedia ada serta menggalakkan pertumbuhan ekonomi secara tidak langsung. Selain itu, berdasarkan transaksi jual beli harta tanah kediaman yang dikeluarkan oleh NAPIC, sehingga kini (Jan 2019 – Jun 2019), jumlah pemilikan rumah oleh warga asing adalah amat rendah dengan jumlah sebanyak 398 orang (0.4%), berbanding pemilikan oleh warga Malaysia iaitu 99,524 orang (99.6%). Secara keseluruhan, transaksi ini menunjukkan pasaran harta tanah kediaman bagi warga asing masih terkawal.

3. Justeru, bagi mengekalkan pertumbuhan ekonomi yang positif, Kementerian Perumahan dan Kerajaan Tempatan (KPKT) mencadangkan agar tindakan segera diambil bagi memastikan lambakan rumah mewah ini terjual dan sekali gus membantu merancakkan kembali ekonomi negara. Sehubungan itu, Kementerian mencadangkan agar rumah-rumah mewah yang tidak terjual ini boleh dijual kepada ekspatriat yang berkecayaan mengikut mekanisme sedia ada Kerajaan melalui program MM2H dan bukanlah melalui HOC seperti yang telah dijelaskan dalam kenyataan media pada 12 September 2019.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : DATUK ZAKARIA BIN MOHD. EDRIS
@ TUBAU [LIBARAN]**

TARIKH : 26 NOVEMBER 2019 [SELASA]

SOALAN

Minta **MENTERI PERUMAHAN DAN KERAJAAN TEMPATAN** menyatakan sejauh manakah keberkesanan Kempen Pemilikan Rumah 2019 atau "*Home Ownership Campaign*" (HOC) 2019 sebagai salah satu inisiatif perumahan di bawah Bajet 2019 dalam mengurangkan jumlah hartanah yang tidak terjual di dalam pasaran.

JAWAPAN

Tuan Yang di-Pertua,

1. Untuk makluman Yang Berhormat, Belanjawan 2019 telah memperlihatkan usaha Kerajaan untuk meningkatkan pemilikan rumah dalam kalangan rakyat dan mengurangkan bilangan rumah atau hartanah yang belum terjual menerusi Kempen Pemilikan Rumah Kebangsaan. Justeru, Kementerian Perumahan dan Kerajaan Tempatan (KPKT) telah mengadakan *Home Ownership Campaign* (HOC) di seluruh negara agar secara langsung diharapkan dapat meningkatkan kebolehmilikan rumah dalam kalangan rakyat Malaysia.

NO SOALAN : 25

2. Melalui pengangjuran HOC ini juga, pelbagai insentif telah diberikan oleh Kerajaan bagi meningkatkan pemilikan rumah dalam kalangan rakyat. Sehingga 11 November 2019, sebanyak 27,823 unit rumah telah dijual sepanjang pengangjuran HOC yang melibatkan nilai jualan sebanyak RM17.657 bilion (jumlah jualan setelah ditolak diskaun).

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

DARIPADA : DATUK ABD RAHIM BIN BAKRI [KUDAT]

TARIKH : 26 NOVEMBER 2019 (SELASA)

SOALAN

DATUK ABD RAHIM BIN BAKRI [KUDAT] minta **MENTERI KESIHATAN** menyatakan apakah Kerajaan bercadang untuk menyediakan perkhidmatan perubatan pakar di hospital-hospital daerah khususnya bagi penyakit-penyakit kritikal (critical illness) di negeri Sabah.

JAWAPAN

Tuan Yang di-Pertua,

Bagi meningkatkan akses kepada perkhidmatan kepakaran di Hospital-hospital KKM termasuk di negeri Sabah, Hospital-hospital KKM telah melaksanakan inisiatif Hospital Kluster dengan menggabungkan sekurang-kurangnya satu (1) hospital berpakar dengan beberapa hospital lain di kawasan geografi yang sama. Perkhidmatan kepakaran akan dikongsi dan dioptimakan melalui pembentukan Hospital Kluster. Perkhidmatan kepakaran dilaksanakan melalui lawatan pakar atau penempatan pakar dari hospital berpakar ke hospital tanpa pakar secara berkala bagi memberikan konsultasi, latihan dan pemantauan.

Di samping itu, pegawai-pegawai perubatan dan anggota-anggota kesihatan yang memerlukan latihan akan diberikan latihan sama ada semasa lawatan pakar atau dihantar ke hospital berpakar bagi menjalankan latihan sangkut. Langkah ini dapat meningkatkan kualiti perkhidmatan kepakaran di dalam kluster tersebut.

Terdapat empat (4) Hospital Kluster di Negeri Sabah yang telah memulakan inisiatif Hospital Kluster, manakala dua (2) lagi masih dalam perancangan. Senarai Hospital Kluster Negeri Sabah yang telah memulakan inisiatif Hospital Kluster adalah:

a) Hospital Kluster Kota Kinabalu

Hospital Queen Elizabeth, Hospital Queen Elizabeth II, Hospital Wanita Kanak-Kanak Likas, Hospital Ranau, Hospital Tuaran, Hospital Kota Belud dan Hospital Papar.

b) Hospital Kluster Tawau

Hospital Tawau, Hospital Semporna, Hospital Kunak dan Hospital Lahad Datu.

c) Hospital Kluster Keningau

Hospital Keningau, Hospital Tambunan dan Hospital Tenom.

d) Hospital Kluster Sandakan

Hospital Sandakan, Hospital Kinabatangan dan Hospital Beluran.

Selain itu, dua (2) Hospital Kluster Negeri Sabah yang akan dibentuk ialah:

a) Hospital Kluster melibatkan Hospital Kota Marudu, Hospital Pitas dan Hospital Kudat; dan

b) Hospital Kluster melibatkan Hospital Beaufort, Hospital Sipitang dan Hospital Kuala Penyu.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : DATO' SERI DR. AHMAD ZAHID BIN HAMIDI
[BAGAN DATUK]**

TARIKH : 26 NOVEMBER 2019 (SELASA)

SOALAN

DATO' SERI DR. AHMAD ZAHID BIN HAMIDI [BAGAN DATUK] minta **MENTERI KESIHATAN** menyatakan berapakah nisbah katil hospital kepada jumlah penduduk negara kita pada ketika ini, dan apakah pihak Kementerian berada di landasan yang betul bagi mencapai nisbah antarabangsa iaitu 2.5 katil bagi setiap 1,000 penduduk.

JAWAPAN

Tuan Yang di-Pertua,

Kementerian Kesihatan Malaysia (KKM) sentiasa prihatin dalam memastikan seluruh rakyat Malaysia dapat menikmati kemudahan kesihatan yang sempurna. Mengikut nisbah semasa katil hospital kepada jumlah penduduk (BPR) negara kita pada tahun 2018 ialah 1.98 katil bagi setiap 1,000 penduduk. Nisbah ini meliputi semua hospital di seluruh Negara termasuk hospital awam dan hospital swasta.

Dalam RMK11, KKM mensasarkan pencapaian nisbah 2 katil bagi setiap 1,000 penduduk menjelang akhir tahun 2020. Sehubungan itu, kita sekarang berada di landasan yang betul bagi mencapai sasaran tersebut. Berdasarkan kadar peruntukan yang disediakan bagi pembangunan hospital dalam RMK sebelum ini, peningkatan BPR adalah dalam lingkungan 0.1 katil / 1,000 penduduk bagi setiap lima tahun dalam Rancangan Malaysia.

SOALAN NO : 28

Bagi mencapai nisbah katil 2.5 setiap 1,000 penduduk (purata bagi negara maju), ianya memerlukan komitmen yang tinggi daripada pihak Kerajaan untuk menyediakan peruntukan yang lebih besar bagi membina hospital-hospital yang baru mahupun menaiktaraf hospital sedia ada. Sungguhpun demikian, kadar peningkatan BPR ini juga bergantung kepada keadaan ekonomi Negara yang boleh mempengaruhi rancangan pembangunan hospital oleh pihak swasta amnya.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : DATO' SERI DR. AHMAD ZAHID BIN HAMIDI
[BAGAN DATUK]**

TARIKH : 26 NOVEMBER 2019 (SELASA)

SOALAN

TUAN STEVEN CHOONG SHIAU YOON [TEBRAU] minta **MENTERI KESIHATAN** menyatakan apakah sistem aliran kerja dalam hospital Kerajaan untuk menangani masalah pesakit di unit kecemasan dan pesakit luar (Out Patients) menunggu lama sebelum dirawat. Adakah kemudahan infrastruktur, seperti kerusi yang mencukupi, tandas yang bersih dan sebagainya, dikawal selia dan dipantau oleh Kementerian Kesihatan supaya pesakit boleh menunggu giliran rawatan dalam keadaan selesa.

JAWAPAN

Tuan Yang di-Pertua,

Kementerian Kesihatan Malaysia (KKM) dari semasa ke semasa sentiasa menambah baik mutu penyampaian perkhidmatan di semua fasiliti kesihatan Kerajaan. Jabatan Kecemasan dan Trauma adalah merupakan salah satu pintu masuk utama bagi kemasukan pesakit ke hospital. Setiap pesakit yang mengunjungi Jabatan ini, mereka akan disaring menggunakan sistem *Malaysian Triage Category* bagi menilai tahap ketenatan pesakit. Ianya terbahagi kepada tiga kategori iaitu Merah (kritikal), Kuning (separa kritikal) dan Hijau (tidak kritikal).

SOALAN NO : 29

Proses saringan ini amat penting untuk memastikan pesakit mendapat rawatan yang sewajarnya pada masa yang ditetapkan dan bukan berdasarkan konsep *first come, first served*. Selepas saringan dilakukan, tempoh masa untuk pesakit diberikan rawatan adalah berdasarkan kategori tersebut di mana bagi kategori Merah (kritikal), pesakit akan dilihat dan dirawat serta merta, kategori Kuning (separa kritikal) akan dilihat dalam tempoh masa kurang dari 30 minit manakala kategori Hijau (tidak kritikal) adalah kurang dari 90 minit.

Tempoh masa ini adalah piawaian yang telah ditetapkan di setiap Jabatan Kecemasan dan Trauma di hospital-hospital KKM. Namun demikian, dengan peningkatan beban kerja di Jabatan Kecemasan dan Trauma, isu masa menunggu terutama bagi kategori Hijau tetap ada. Bagi mengatasi masalah ini, inisiatif *Lean* telah dijalankan bagi mengurangkan masa menunggu pesakit.

Pada masa ini, setiap Jabatan Kecemasan dan Trauma turut disediakan kerusi kepada pesakit sementara menunggu giliran untuk menerima rawatan dan waris yang mengiringi pesakit hendaklah memberi keutamaan kepada pesakit. Infrastruktur lain seperti kemudahan tandas turut disediakan dan kerja pembersihan adalah dilaksanakan oleh pihak konsesi. KKM sentiasa komited dalam memastikan kemudahan yang disediakan kepada pesakit berada dalam keadaan terbaik.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

DARIPADA : DATO' DR. NORAINI AHMAD [PARIT SULONG]

TARIKH : 26 NOVEMBER 2019 [SELASA]

SOALAN

Minta **MENTERI PERUMAHAN DAN KERAJAAN TEMPATAN** menyatakan rasional cadangan Kementerian untuk adakan Kempen Pemilikan Rumah (HOC) khas kepada warga China dan Hong Kong dan apakah bentuk penyelesaian yang pragmatik untuk menyediakan rumah mampu milik kepada rakyat tempatan selain mempromosinya kepada warga asing.

JAWAPAN

Tuan Yang di-Pertua,

1. Untuk makluman yang berhormat, Kempen Pemilikan Rumah (HOC) merupakan program yang diperuntukkan kepada rakyat Malaysia sahaja bagi memiliki kediaman dengan insentif yang diberikan oleh Kerajaan dan diskaun daripada pihak pemaju. Manakala program Malaysia My Second Home (MM2H) adalah satu inisiatif Kerajaan Malaysia untuk menarik dan menawarkan peluang kepada warganegara asing yang mempunyai kemampuan kewangan yang tinggi serta memenuhi syarat untuk menetap dan merancakkan ekonomi di Malaysia melalui subsektor pelaburan, hartanah, pendidikan, perubatan dan automobil.

2. Berdasarkan data Pusat Maklumat Harta Tanah Negara (NAPIC) terdapat 4,213 (12.8%) rumah mewah berharga RM1 juta ke atas dengan nilai RM8.3 bilion tidak terjual di negara ini sehingga suku kedua tahun 2019. Sehubungan itu, penjualan rumah mewah kepada warga asing dapat mengurangkan lambakan unit rumah mewah sedia ada serta menggalakkan pertumbuhan ekonomi secara tidak langsung.

3. Selain itu, berdasarkan transaksi jual beli hartanah kediaman yang dikeluarkan oleh NAPIC, sehingga kini (Jan - Jun 2019), jumlah pemilikan rumah oleh warga asing adalah amat rendah dengan jumlah sebanyak 398 orang (0.4%), berbanding pemilikan oleh warga Malaysia iaitu 99,524 orang (99.6%). Secara keseluruhan, transaksi ini menunjukkan pasaran hartanah kediaman bagi warga asing masih terkawal.

4. Justeru, bagi mengekalkan pertumbuhan ekonomi yang positif, Kementerian Perumahan dan Kerajaan Tempatan (KPKT) mencadangkan agar tindakan segera diambil bagi memastikan lambakan rumah mewah ini terjual dan sekaligus membantu merencanakan kembali ekonomi negara. Sehubungan itu, KPKT mencadangkan agar rumah-rumah mewah yang tidak terjual ini boleh dijual kepada ekspatriat yang berkecukupan mengikut mekanisme sedia ada Kerajaan iaitu melalui program MM2H dan bukanlah melalui HOC seperti yang telah dijelaskan dalam kenyataan media pada 12 September 2019. China dan Hong Kong pula dipetik sebagai contoh antara negara yang boleh disasarkan memandangkan harga purata hartanah di negara tersebut adalah tinggi.

5. Bagi penyediaan perumahan mampu milik kepada rakyat tempatan, Kerajaan kekal komited untuk memastikan capaian (*accessibility*) rakyat untuk memiliki rumah melalui inisiatif perumahan sedia ada seperti:

- i. **Penyediaan 1 Juta Rumah Mampu Milik (RMM)** dalam tempoh 10 tahun di seluruh negara sebagaimana Manifesto Pakatan Harapan melalui agensi-agensi pelaksana seperti

KPKT, lain-lain Kementerian, Kerajaan Negeri dan pihak swasta;

- ii. **Skim pembiayaan kewangan fleksibel** yang menawarkan pakej pinjaman menyeluruh merangkumi pembayaran berperingkat dan pembeli yang layak membayar ansuran bulanan pinjaman rumah yang lebih rendah daripada pinjaman biasa;
- iii. **Skim pembiayaan Dana RM1 Bilion oleh Bank Negara Malaysia (BNM)**. Dana berjumlah RM1 bilion ini diwujudkan untuk membantu pembeli rumah daripada kumpulan berpendapatan rendah di seluruh negara bagi membiayai pembelian rumah pertama mereka. Dana ini akan tersedia selama dua tahun mulai 2 Januari 2019 atau sehingga dana RM1 bilion itu habis digunakan. Skim ini telah ditambah baik kepada pendapatan maksimum bulanan isi rumah dinaikkan sehingga RM4,360 dan harga maksimum harta tanah dinaikkan sehingga kepada RM300,000;
- iv. **Pemanjangan tempoh pembiayaan perumahan sektor awam di bawah Lembaga Pembiayaan Perumahan Sektor Awam (LPPSA)** di mana tempoh pembiayaan pertama dinaikkan daripada 30 tahun kepada 35 tahun;
- v. **Jaminan Cagamas SRP Berhad** untuk membantu golongan muda yang berpendapatan RM3,000 sebulan dan ke bawah untuk memiliki rumah. Cagamas SRP akan menjamin 10% (dari 90% hingga 100%) daripada pembiayaan berkenaan;
- vi. **Diskaun Plus**, penawaran diskaun oleh pemaju perumahan dengan zero deposit (yang disokong oleh skim jaminan Cagamas/Skim Jaminan Kredit Perumahan) meningkatkan keupayaan pembeli dengan memberi jaminan kewangan kepada pembeli;

- vii. **FundMyhome (Crowd Funding)**, konsep di mana rakyat boleh mendapatkan bantuan kewangan untuk membeli rumah melalui kaedah pinjaman terbuka. Pembeli cuma perlu membayar 20% daripada harga rumah manakala baki 80% akan disumbang oleh pembiaya yang terlibat dan pulangan akan dikongsi bersama pada masa hadapan; dan
 - viii. **Pengecualian duti setem dan pelepasan cukai** juga diberikan ke atas pembelian rumah pertama yang berharga RM300,000 ke bawah berkuat kuasa 1 Januari 2019 sehingga Disember 2019 yang dilaksanakan melalui HOC 2019. Pengecualian ini dilihat dapat mengurangkan bebanan kewangan isi rumah terutamanya golongan berpendapatan rendah dan sederhana.
6. Selain itu, antara inisiatif perumahan baharu yang sedang dikaji oleh kerajaan adalah:
- i. **Penyediaan program perumahan RMM di bawah KPKT iaitu Rumah Malaysia** akan menggunakan spesifikasi dan ciri-ciri di bawah Dasar Rumah Mampu Milik (DRMM) iaitu keluasan rumah minimum 900kps dan berdasarkan pendapatan isi rumah median mengikut lokaliti dan negeri;
 - ii. **Program Sewa Untuk Memiliki / Rent-to-Own (RTO)**. Dana sebanyak RM2 bilion akan disediakan oleh institusi kewangan untuk ditawarkan kepada rakyat kumpulan B40 dan M40 terendah bagi memiliki rumah mampu milik yang berharga RM300,000 dan ke bawah secara sewaan. Seterusnya bermula pada tahun kedua, penyewa diberi pilihan untuk memiliki hartanah kediaman tersebut setelah memenuhi syarat kelayakan pinjaman perumahan;
 - iii. **Penggubalan Akta Sewa Kediaman (RTA)** bagi pemilikan perumahan persendirian. RTA yang digubal akan lebih

menyeluruh dan komprehensif dalam menangani isu-isu penyewaan dan pemilikan rumah pada masa akan datang;

- iv. **Skim perkongsian ekuiti perumahan (Cagamas Shared Equity Scheme) di bawah Cagamas Berhad.** Di bawah skim ini Cagamas akan menyalurkan 20% deposit sebagai pinjaman dengan kadar keuntungan (*interest rate*) yang lebih rendah bagi pihak pembeli, manakala baki 80% disediakan oleh pihak bank. Cadangan ini turut membabitkan pembiayaan alternatif yang mana Cagamas akan membantu memberi jaminan sehingga 100% daripada harga rumah tersebut; dan
 - v. KPKT dengan kerjasama Pusat Maklumat Harta Tanah Negara (NAPIC) sedang membangunkan **Housing Integrated Management System (HIMS)** bertujuan untuk menyediakan sistem lengkap mengenai maklumat penawaran serta keperluan untuk mengurangkan *mismatch* serta memastikan perancangan perumahan yang lebih terancang dan sistematik.
7. Kesimpulannya, inisiatif-inisiatif ini telah dan akan dilaksanakan oleh Kerajaan bagi membantu memastikan setiap rakyat mampu memiliki rumah berkualiti khususnya untuk golongan B40 dan M40.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN
DARIPADA : YB DATO' HAJI ABDUL RAHMAN BIN MOHAMAD
KAWASAN : LIPIS
TARIKH : 26 NOVEMBER 2019 (SELASA)

SOALAN :

YB DATO' HAJI ABDUL RAHMAN BIN MOHAMAD minta **MENTERI KERJA RAYA** menyatakan bilakah kerja-kerja bagi Projek Lebuhraya Central Spine Road yang diperkenalkan oleh kerajaan terdahulu melibatkan Pakej 3 dari Gua Musang, Kelantan ke Kg. Relong, Kuala Lipis, Pahang sejauh 93.8km, Pakej 4 dari Kg. Relong, Kuala Lipis ke Raub, Pahang sejauh 50km dan Pakej 5 dari Raub ke Bentong, Pahang sejauh 54km akan dimulakan dan disiapkan sepenuhnya.

JAWAPAN :

Tuan Yang Di-Pertua,

Untuk makluman Ahli Yang Berhormat, Projek *Central Spine Road* (CSR) dari Kuala Krai, Kelantan ke Simpang Pelangai, Pahang sepanjang 346.3km telah pun dimulakan secara berperingkat dalam Rancangan Malaysia Kesembilan (RMKe-9) dan dibahagikan kepada enam (6) pakej utama iaitu:

- 1) Pakej 1: Kuala Krai ke Jambatan Sungai Lakit, Kelantan (47km);
- 2) Pakej 2: Jambatan Sungai Lakit ke Gua Musang, Kelantan (59km);
- 3) Pakej 3: Gua Musang ke Kampung Relong, Kuala Lipis, Pahang (93.8km);
- 4) Pakej 4: Kampung Relong, Kuala Lipis ke Raub, Pahang (45km);
- 5) Pakej 5: Raub ke Bentong, Pahang (54km); dan
- 6) Pakej 6: Bentong ke Simpang Pelangai, Pahang (47.5km).

Projek CSR dilaksanakan secara berperingkat berdasarkan keutamaan kepada aspek keselamatan dan kesesakan lalu lintas. Sehingga kini, jajaran sepanjang 184.6km telah diluluskan untuk pelaksanaan iaitu 167.1km di Negeri Pahang (Pakej 3, 4 dan 5) dan 17.5km di Negeri Kelantan (Pakej 3). Status projek yang telah diluluskan untuk pelaksanaan adalah seperti berikut:

Sehingga kini, jajaran di Pakej 3 iaitu dari Mentara Kampung Seberang Jelai, Pahang sepanjang 55.25km telah siap dan dibuka kepada pengguna. Jajaran sepanjang 5.78km di Pakej 5 iaitu dari Kampung Asap ke Kampung Sertik juga telah siap pembinaan pada Oktober 2018.

Jajaran yang sedang **dalam pembinaan** pula adalah sepanjang 64.52km iaitu:

Pakej 3

1) Seksyen 3D dari Bulatan Gua Musang ke Mentara, Kelantan sepanjang 10.5km yang telah dimulakan pada April 2018 dan dijadualkan siap pada Oktober 2022. Kemajuan semasa adalah sebanyak 9%.

2) Seksyen 3E1 dari Mentara ke Merapoh, Pahang sepanjang 5.8km yang telah dimulakan pada September 2016 dan dijadualkan siap pada Februari 2020. Kemajuan semasa adalah sebanyak 90%.

Pakej 5

1) Seksyen 5A Raub Bypass sepanjang 9.6km yang telah dimulakan pada Jun 2016 dan dijadualkan siap pada Jun 2022. Kemajuan semasa adalah sebanyak 0.52%.

2) Seksyen 5B dari Kampung Orang Asli Sungai Chandan ke Kampung Asap sepanjang 16km yang telah dimulakan pada Mac 2018 dan dijadualkan siap pada Mac 2021. Kemajuan semasa adalah sebanyak 28.5%.

3) Seksyen 5C2 dari Kampung Asap ke Kampung Sertik dan Seksyen 5D Bentong Bypass sepanjang 22.7km yang telah dimulakan pada April 2016 dan dijadualkan siap pada September 2020. Kemajuan semasa adalah sebanyak 89%.

Jajaran yang sedang **dalam peringkat perolehan** pula adalah sepanjang 33.4km iaitu:

Pakej 3

1) Seksyen 3B & 3C dari KM180.5 FT08 ke Bulatan Gua Musang sepanjang 7km yang dijangka akan mula pembinaan pada suku keempat tahun 2019.

2) Seksyen 3J dari Kampung Seberang Jelai ke Kampung Relong sepanjang 6.95km yang juga dijangka akan mula pembinaan pada suku keempat tahun 2019.

Pakej 4

1) Seksyen 4C dari Sega Lama ke Kuala Dong sepanjang 5.8km yang kini dalam peringkat perancangan untuk ditender.

2) Seksyen 4D dari Kuala Dong ke Kampung Tanah Bercangkul sepanjang 13.6km telah ditender pada 13 September 2019.

Seterusnya, jajaran yang sedang **dalam peringkat perancangan** pula adalah sepanjang 25.25km iaitu:

Pakej 4

1) Seksyen 4A dari Kampung Relong ke Penjom sepanjang 15km yang kini dalam peringkat perancangan Makmal Pengurusan Nilai peringkat Kejuruteraan Nilai.

2) Seksyen 4B Benta Bypass sepanjang 10.25km kini dalam peringkat rekabentuk terperinci.

Baki pakej yang masih belum dilaksanakan untuk Projek CSR dirancang untuk dilaksanakan dalam tempoh *Rolling Plan* dan Rancangan Malaysia yang seterusnya, tertakluk kepada kelulusan peruntukan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN
DARIPADA : YB DATUK WILSON UGAK ANAK KUMBONG
KAWASAN : HULU RAJANG
TARIKH : 26 NOVEMBER 2019 (SELASA)

SOALAN :

YB DATUK WILSON UGAK ANAK KUMBONG minta **MENTERI KERJA RAYA** menyatakan sekiranya pihak Kementerian bercadang untuk menaik taraf Jalan Simpang Bakun ke Empangan Bakun.

JAWAPAN :

Tuan Yang Di-Pertua,

Untuk makluman Ahli Yang Berhormat, Jalan Simpang Bakun ke Empangan Bakun yang dimaksudkan ialah Jalan Persekutuan FR803. Berdasarkan semakan stesen bancian yang terhampir dan isipadu trafik lalulintas yang terkini mendapati bahawa Tahap Perkhidmatan Jalan (Level of Service, LOS) berada pada tahap LOS A. Oleh yang demikian, tiada keperluan untuk menaiktaraf jalan tersebut pada masa kini memandangkan aliran trafik masih lancar serta mampu ditampung oleh jalan sedia ada.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : TAN SRI NOH BIN HAJI OMAR
[TANJONG KARANG]**

TARIKH : 26 NOVEMBER 2019 [SELASA]

SOALAN

Minta **MENTERI PERUMAHAN DAN KERAJAAN TEMPATAN** menyatakan dalam tempoh pentadbiran PH berapa jumlah kekosongan PPR yang masih belum diisi mengikut negeri.

JAWAPAN

Tuan Yang di-Pertua,

1. Untuk makluman Yang Berhormat, sehingga 30 September 2019, jumlah unit rumah Program Perumahan Rakyat (PPR) yang masih belum diisi adalah sebanyak 7,964 unit. Jumlah ini merangkumi unit rumah PPR Dimiliki dan juga PPR Disewa. Namun begitu, jumlah tersebut akan berkurangan memandangkan Kementerian Perumahan dan Kerajaan Tempatan (KPKT) sedang dalam proses melaksanakan pelbagai peringkat pengisian yang melibatkan proses pemilihan, saringan, jawatankuasa dan pengeluaran surat tawaran.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN
DARIPADA : YB PUAN WONG SHU QI
KAWASAN : KLUANG
TARIKH : 26 NOVEMBER 2019 (SELASA)

SOALAN :

YB PUAN WONG SHU QI minta **MENTERI KERJA RAYA** menyatakan sama ada Kerajaan akan membina laluan pejalan kaki di Tambak Johor dan Bangunan Sultan Iskandar dan bila akan melaksanakan projek tersebut.

JAWAPAN :

Tuan Yang Di-Pertua,

Untuk makluman Ahli Yang Berhormat, pihak Kerajaan Persekutuan melalui Jawatankuasa *Technical Working Group* (TWG) Bagi Menangani Kesesakan Di Tambak Johor yang diurusetikan oleh Kementerian Dalam Negeri (KDN) sedang dalam tindakan meneliti cadangan ini. Cadangan konsep daripada Kerajaan Negeri Johor melalui Pengerusi Jawatankuasa Kerja Raya, Infrastruktur dan Pengangkutan Johor telah dibentangkan ke Kementerian ini antara lain mencadangkan pembinaan laluan pejalan kaki berbumbung di Tambak Johor sebagai salah satu usaha penambahbaikan di dalam usaha untuk mengurangkan kesesakan di Tambak Johor dan Bangunan Sultan Iskandar (BSI).

Pada masa ini, cadangan tersebut akan diperhalusi dan terdapat keperluan untuk diadakan bengkel *Value Assesment* (VA) yang dianggotai oleh agensi pelaksana serta agensi teknikal berkaitan untuk dimuktamadkan sebelum kebolehlaksanaan projek ini diputuskan oleh Kerajaan. Perincian mekanisma pelaksanaan serta perincian projek ini juga akan diteliti di dalam bengkel VA tersebut.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN
DARIPADA : YB TUAN SHAHARIZUKIRNAIN BIN ABD KADIR
KAWASAN : SETIU
TARIKH : 26 NOVEMBER 2019 (SELASA)

SOALAN :

YB TUAN SHAHARIZUKIRNAIN BIN ABD KADIR minta **MENTERI KERJA RAYA** menyatakan kos pembinaan LPT2 yang dibiayai oleh Kerajaan Negeri Terengganu, adakah Kerajaan bercadang untuk membayar kos tersebut kepada Kerajaan Negeri Terengganu dan jika ya, bilakah akan bermula pembayaran balik.

JAWAPAN :

Tuan Yang Di-Pertua,

Untuk makluman Ahli Yang Berhormat, projek Lebuh raya Pantai Timur 2 (LPT2) telah dipersetujui pelaksanaannya secara perkongsian bersama di antara Kerajaan Persekutuan pada ketika itu dengan Kerajaan Negeri Terengganu di mana RM1.85 billion daripada keseluruhan kos pembinaan LPT berjumlah RM4.1 billion telah dibiayai menerusi peruntukan dana khas Kerajaan Pusat kepada Kerajaan Negeri Terengganu.

Berdasarkan syarat dan terma utama dalam perjanjian konsesi, ia tidak menetapkan sebarang terma bagi perkongsian keuntungan (profit sharing) antara pihak konsesi LPT 2 Sdn Bhd dengan kerajaan sama ada Kerajaan Pusat atau Kerajaan Negeri. Keputusan ini dibuat pada ketika itu dengan mengambil kira hasil penilaian keseluruhan oleh Jawatankuasa Kerjasama Awam Swasta (JKAS) dari segi tempoh konsesi, kadar tol, aliran trafik dan kadar pulangan dalaman (IRR) kepada pembida konsesi.

Oleh yang demikian, ini bermakna isu perkongsian hasil ataupun pembayaran balik kos pembiayaan kepada Kerajaan Negeri Terengganu sebenarnya tidak berbangkit.

Sekian, terima kasih.